

# Skeal er ny insh liorish Illiam y Radlagh

A story by Dick Radcliffe

This story can be listened to in the advanced section of the site



Haink meer dy hennaghys my raad er y gerrid. She'n irriney eh gyn ouyrs erbee as er lhams dy vel eh symoil mychione Fin McCooil, yn Foawr Yernagh as yn Foawr Manninagh ain hene.

Va noidys eddyr yn jees jeu as va'n argane oc bentyn rish qoui b'lesh shiartanse dy ellanyn ayns ushtaghyn twoaie.

Ansherbee, va corree jiarg ec Fin as ren en baggyrtys dy darragh eh dys shoh ayns yn Ellan as y Foawr Manninagh y chur gy baase. Cha row ad rieu er veeiteil y cheilley agh va Fin McCooil foddey smoo as ny stroshey na'n Fer Manninagh.

Myr shoh, tra cheayll y Manninagh c'red va er chee cheet er, ren eh siyr dy valley as dinsh eh ooilley da'n ven echey, kys v'eh goaill aggle roish Fin as dy jarroo v'eh ayns stayd treih.

Ec y traa shen ta mee credjal dy row ad beaghey heose er lhiattee Glion Auldyn. Traa va mish mygeayrt er y twoaie vooar, v'ad cur er y Thie y Foawr Thie Collister as t'eh ny hassoo foast ayns shen.

Ansherbee, va'n Foawr agglit dy liooar as dooyrt y ven "Ny gow aggle my voght veen. Ersooyl lhiat heose greeishyn, lhie oo sheese as caddill oo. Bee dy chooilley red mie dy liooar"

Ren eh myr v'eh er n'insh as hie Ben y Foawr mygyeart e kiartaghyn. Cheau ee foaid ny ghaa er yn aile as hoie ee sheese ec y cheeill-çhiollee. Ren ee garrey ec y wheeyl. Sneeu ta shiu toiggal.

Va ooilley kiune derrey haink yllagh niartal çheu-mooie y thie. Roie y ven as doshil ee yn dorrys as quoi v'ayn agh Fin MacCooil hene as v'eh geamagh. "Mish Fin MacCooil as ta mee shirrey Thie yn Foawr Manninagh. Vel eh beaghey ayns shoh?"

"Ta, ta" dooyrt ish. "Shoh yn thie echey. Trooid shiu stiagh as fuirree rish. Cha nel eh hene ayn nish agh cha bee eh foddey".

Haink Fin stiagh er y dorrys as vrie y ven jeh dy hoie sheese as goaill aash. Lurg paart dy hraa dooyrt Ben y Foawr "By vie lhiu red ennagh dy ee? Ta slissag feayr dy vuc rostit ayn as foddee bee cappan dy hey goll!"

Gow Fin yn longey as y ven foast ny soie dy kiune ec y çhiollagh. Doaltattymagh, haink sheean ard veih mullagh ny greeishyn. She strinnoogh trome v'eh ard ard agglagh.

Cha ren y ven gra veg as lurg tammylt sodjey dooyrt ee rish Fin.  
"By vie lhiu tooilliu?"

"Cha nel. S'lioar dou shen" dooyrt Fin. "Feer vie" as ish. Agh ayns tammylt beg hrog ee seose e sooillyn as jeeaghyn er Fin. "Tar marym as eiyrryms". Ren ee eshyn y leeideil dys cass ny greeishyn as ghrapp ad sy coleayrtys dys y vullagh raad va ghaa ny tree dorrysyn ny shamyryn cadlee.

Liorish y traa shoh va sheean strinnoogh olk er basthal. Va'n eer laare hene ooilley er craa as cha dod fer chlashtyn veg!

Heeyn magh Ben y Foawr e laue as ghow ee greim er snig y ghorrys voish va yn sheean ooilley cheet.

Hug ee y laue elley er geayltyn Fin as dooyrt ee rish "By vie lhiu fakin yn oikan noa?" Traa hyndaa ee mygeayrt cha row Fin ynyrican er n'goll ass y thie, v'eh bunnys ass shilley.

And they say he hasn't come back yet!!!